

四庫全書

集部

欽定四庫全書

集部

風雅翼卷

五

詳校官中書

臣丁榮祚

助教

臣

常循覆勘

總校官知縣

臣

繆

琪

校對官編修

臣

勵守謙

謄錄監生

臣

邵敬修

欽定四庫全書

風雅翼卷五

元 劉履 編

選詩補註五

晉詩三

陶潛字淵明後以字為名更字元亮潯陽柴桑人
大尉長沙公侃之曾孫少有高趣嘗著五柳先生
傳以自況親老家貧起為州祭酒不堪吏職解歸

州召主簿不就躬耕自資隆安中為鎮軍參軍義
熙元年遷建威參軍未幾求為彭澤令在縣八十
餘日因郡遣督郵至吏白當束帶見之乃曰吾豈
能為五斗米折腰向鄉里小兒即解印綬賦歸去
來暨八宋終身不仕顏延年誄之謚曰靖節徵士
世因號靖節先生

停雲

四言四
章并序

停雲思親友也樽湛新醪園列初榮願言不從歎息

彌襟

靄靄停雲濛濛時雨八表同昏平路伊阻靜寄東軒春
醪獨撫良朋悠邈搔首延佇

比也靄靄盛貌停者凝而不散之意八表猶言八方
伊惟也寄止託也撫慰搔抓也 此盖元熙禪晉之

後而靖節之親友或有歷仕於宋者故特思而賦詩
且以寓規諷之意焉此章言停雲時雨以喻宋武陰
凝之盛而微澤及物表昏路阻以喻天下皆屬於宋

而晉臣無可仕之道矣我則靜止東軒飲酒自慰何
乃良朋遠去使人搔首佇望而不歸耶

停雲靄靄時雨濛濛八表同昏平陸成江

叶古紅反

有酒有

酒閒飲東牕

叶音忽

願言懷人舟車靡從

比也高平曰陸

此承上章反覆言之平陸成江亦

以寓陵谷變遷之意舟車靡從即路阻之意也

東園之樹枝條再榮競用新好

如字

以招余情人亦有言

日月于征安得促席說彼平生

比也東園喻宋都據其在潯陽之東而言用猶為也
此言歷事新朝之人亦猶東園再榮之樹競為新
好姿容以招誘余情使之出仕然余又聞日月于征
之言亦知時不可留但平生素抱有非若人所能知
者惜乎不得促席與之剖說也

翩翩飛鳥息我庭柯斂容閑止好聲相和豈無他人念
子實多願言不獲抱恨如何

興也言庭柯之鳥翔集從容和鳴而相親以興仕塗

之人當擇所處不可遺棄親友而不顧返也且他人之苟祿者亦豈無之惟我與子素相親厚故於此實深念之耳始也搔首而懷望中則欲與促席而開陳至此乃決然知其不復來歸則是願言不獲而中心為之抱恨此可見靖節之於親友情之至義之盡也

榮水

四言四章并序

榮木念將老也日月推遷已復有夏總角聞道白首無成

采采榮木結根于茲晨耀其華

如夕

已喪之人生若寄

顛顛有時靜言孔念中心悵而

賦也采采榮鮮貌喪凋落也顛顛形容衰瘠之貌孔

甚也而語詞此靖節自勵之詩言榮木結根有托

尚朝華而夕衰人生本無根蒂如寄世耳幾何而不

至於顛顛乎言念及此則中心為之悵然矣

采采榮木于茲託根繁華朝起慨暮不存貞脆

此苟反

由

人禍福無門匪道曷依匪善奚敦

賦也物易斷者謂之脆道者日用當行之理所謂中庸是也善者為德之實所當擇而行者也此承上章言木之榮謝則係乎時人之貞脆實由於已能養之以福則貞固可久不能保養以取禍則脆而易折且禍福無門莫不自己求之者惟依乎道則心常中正敦乎善則德益加厚此乃所以自求福也舍是復何為哉

嗟予小子稟茲固陋徂年既流業不增舊志彼不舍安

此日富我之懷矣怛焉內疚

賦也固執滯也業即上章依道敦善之事志記也富猶甚也 此章謙言才質不美年既往而業不增惟當志彼不舍晝夜之語而自強不息今乃安此自怠而日甚焉則我之懷矣安得不驚惕而病于心乎或曰志當作忘

先師遺訓余豈云

一作之

墜四十無聞斯不足畏貽我名

車策我良驥千里雖遥孰敢不至

賦而比也先師孔子也脂以脂膏塗其車軸使滑澤也此承上章內疚之言因不墜先聖遺訓而勵志奮力求必至焉而後已故以脂車策馬不憚千里為喻識者以靖節為造道豈非力行不已之功歟

九日閒居

并序

余間居愛重九之名秋菊盈園而持醪靡由空服九華寄懷於言

世短意恒多斯人樂久生日月依辰至舉俗愛其名露

淒暄風息氣澈

直列反

天象明往燕無遺影來鴈有餘聲

酒能祛百慮菊為

去聲

制顏齡如何蓬廬士空視時運傾

塵爵耻虛壘寒華徒自榮歛襟獨閒謠
緬焉起深情棲遲固多娛淹留豈無成

賦而比也依辰至謂日與月之數皆九也澈澄祛却
制御也顏齡衰年也本草謂菊能輕身延年傾去之急
也時運傾李公煥謂指易代之事爵壘皆酒器謠歌
緬遠也此靖節因時詠懷以自遣之詩首謂人之

生年雖短而意慮常多惟樂久存於世是以愛此重
九之名者通人情而言之也次言天象改觀時物存
替者以喻世代之變草晉亡而宋日盛也且欲為今
日之樂惟當酌酒以消憂滄菊以引年如何使我空
視時運之傾而有塵爵虛壘之耻其意蓋謂爵資於
壘壘虛則爵生塵以喻士資養於朝廷今晉既傾覆
則士遭困窮能不為之耻乎寒華徒榮亦以自況其
固守之意夫時既若此我則歛襟間謠緬焉深想而

於棲遲自娛獨善其身是豈無成也哉此可見其不
為貧窶動心而能自樂者矣

歸田園居

三首

少無適俗韻性本愛丘山

叶翰
辨反

誤落塵網中一去三十

年

三當作踰或在十字之下
年起為州祭酒時年二十有九

靖節年譜太元十八
正合飲酒詩投來去

學仕是時向立年之句以此推之至
彭澤退歸才十三年此云三十誤矣

羈鳥戀舊林池魚

思故淵開荒南野際守拙歸園田方宅十餘畝草屋八

九間

叶經
天反

榆柳蔭後園桃李羅堂前曖曖

音遠

人村依

依墟里烟狗吠深巷中鷄鳴桑樹顛戶庭無塵雜虛室

有餘閒

叶何堅反

久在樊籠裏復得返自然

賦也適者往入於彼而能諧之謂韻亦音諧之名塵

網喻仕塗曖曖遠見不明之貌樊吳材老韻補云繫

不行也一云藩也此詩蓋靖節彭澤退歸後所作

故於首篇言誤落塵網已踰十年常如鳥戀舊林魚

思故淵今乃歸休田野而其景趣幽遠閒靜如此正

猶久在樊籠而復得返自然也

野外罕人事窮巷寡輪鞅白日掩荆扉虛室絕塵想時
復墟曲中披草共來往相見無雜言但道去聲桑麻長桑
麻日已長我志一作道日已廣常恐霜霰至零落同草
莽

賦而比也輪車輪鞅馬鞅也墟曲墟里中曲折處也
莽草深貌此篇言野外事簡人靜絕無塵慮唯與
隣曲往來共談桑麻之長而已然我之生理有成而
志願已遂但恐天時變草霜霰凋傷而零落同於草

莽耳蓋是時朝廷將有傾危之禍故有是喻然則靖節雖處田野而不忘憂國於此亦可見矣

種豆南山下草盛豆苗稀晨興

一作晨侵

理荒穢帶月荷

上去

二聲鉏歸道狹草木長夕露沾我衣衣沾不足惜但使願

無違

賦也靖節既退休田里惟躬耕自資保全名節乃其至願也故此詩言種豆南山雖不免晨興夕歸之勤草露沾衣之苦亦不足惜但使素願無違如此足矣

此與後篇西田穫稻詩意實相表裏

移居 二首

昔欲居南村非為卜其宅聞多素心人樂與數_音晨夕
懷此頗有年今日從茲役樊廬何必廣取足蔽床席隣

曲時時來抗言談在

一作往

昔竒文共欣賞疑義相與析

賦也南村眉山楊恪曰柴桑之南村江州志云公本
居山南之上京後遇火徙柴桑素心恬靜寡欲之謂
數晨夕言相見之頻也抗不相下也說具下篇

春秋多佳日登高賦新詩過門更平相呼有酒斟酌之

農務各自歸間暇輒相思相思則披衣言笑無厭時此

理將不勝

音升

無為忽去茲衣食當須紀力耕吾不欺

賦也披衣謂起而相尋也不勝言樂此無窮盡也

按本集還舊居詩云疇昔家上京六載去還歸蓋自

隆安庚子始作鎮軍參軍至義熙乙巳還歸正及六

載逮戊申歲六月遇火遂遷是居此義熙四年也言

移居南村本欲得隣曲素心之人日相往來論文析

理酌酒笑言樂之終身而不舍去且素願易足不必
充廣唯衣食所當經紀者亦必力耕以自給焉此與
世俗懷居之士擇取便安務求完美者不可同年語
矣

和劉柴桑

柴桑縣名今江州之德化縣也彭城劉遺民
嘗作柴桑令後遁跡匡廬與靖節及周續之
號潯陽三隱

山人久見招胡事乃躊躇直為親舊故未忍言索居良
辰入奇懷挈杖還西廬荒塗無歸人時時見廢墟茅茨
已就治平聲新疇復應畬谷風轉淒薄春醪解飢弱女
雖非男慰情良勝無栖栖世中事歲月共相疎耕織稱
其用過此奚所須去去百年外身名同翳如

賦也索居言獨居蕭索也禮記子夏曰吾離群索居
久矣西廬指上京之舊居治葺應當也田三歲曰畬
谷風東風也淒薄猶言料峭寒意也飢疲勞也弱女

趙山泉曰此特諧謔以喻酒之醅薄也栖栖猶皇皇
翳如謂泯滅也遺民隱居廬山日與靖節相往復
即所謂素心人欣賞奇文者也此詩因和遺民而作
故言久欲深隱山澤但為爾等親舊之故未忍離去
乃今春月將有事於西疇輒還舊居雖曰荒廢之餘
然其茅茨既葺新禽當理亦有濁酒自足慰吾飢飭
之情而於栖栖世中之事日相疎遠矣且耕織所獲
但取稱吾用耳過此復何所須蓋人生既沒之後身

與名且不得存況外物乎

和郭主簿

藹藹堂前林中夏貯

直呂反

清陰凱風因時來回飈吹我

襟息交游間業卧起弄書琴園蔬有餘滋舊穀猶儲今

營已良有極過足非所欽舂秫作美酒酒熟吾自斟弱

子戲我側學語未成音此事真復樂聊用忘華簪遙遙

望白雲懷古一何深

賦也中夏夏中也一云中與仲同貯停積也息交謂

暫止朋友之往來也游者玩物適情之謂滋蕃也儲
今言至今有餘積也過足謂不知止者華簪貴者所
珥此詩雖因和人而直寫已懷但據見在不為過
求而目前所接莫非真樂是則世之榮利豈有可動
其中者哉末言遙望白雲深懷古人之高跡其意遠
矣

贈羊長史

并序

左軍羊長史銜命秦川作此與之

愚生三季後慨然念黃虞得知千載外上賴古人書賢

聖留餘跡事事在中都豈忘游心目關河不可踰九域

甫已

一作爾

一逝將理舟輿聞君當先邁負病不獲俱路

若經商山為我少躊躇多謝綺與角

盧谷反

精爽今何如

紫芝誰復採深谷久應蕪駟馬無貫

音世

患貧賤有交娛

清謠結心曲人乘運見疎擁懷累代下言盡意不舒

賦也三季三代之末黃虞黃帝虞舜也中都猶言中

州關河張儀謂秦地被山帶河四塞以為固是也九

域九州之界限已一謂是時燕秦已平合而為一也
商山在商州上路縣綺角四皓名園公綺里季夏黃
公角里先生今止稱二名省文也四皓避秦共入商
洛山作歌曰漠漠高山深谷逶迤曄曄紫芝可以療
飢唐虞世遠吾將安歸駟馬高蓋其憂甚大富貴之
畏人不如貧賤而肆志貫貸結繫也 義熙十三年
太尉劉裕伐秦破長安送秦主姚泓詣建康受誅時
左將軍朱齡石遣長史羊松齡往關中稱賀而靖節

作此詩贈之其意蓋謂平生慨念古昔達觀世故素有慕於四皓之風節矣今天下喪亂將有易代之禍思欲與之同遊而不可得是以因松齡使次商山使特為我謝之也然商山之歌尚結於我之心而商山之人則已乘世運而遠逝遂使我襟懷擁塞言雖盡而意不舒也

歲暮和張常侍

市朝淒舊人驥感悲泉明旦非今日歲暮余何言素

顏歛光潤白髮一已繁

叶汾
反

闊哉秦穆談旅力豈未愆

向夕長風起寒雲沒西山

叶輸
旃反

厲厲氣遂嚴紛紛飛鳥

還

句緣
反

民生鮮常在矧伊愁苦纏屢報清酤至無以樂

當年窮通靡攸慮顛顛由化遷撫已有深懷履運增慨

然

賦而比也驟驥謂日駕悲泉日入處也淮南子曰日

至悲泉爰息其馬是謂縣車此蓋借以喻乘輿之駕

馬也旅通作脅愆失也書秦誓穆公曰旅力既愆此

言朱愆未詳矧况也酤一宿酒也 按晉史義熙十

四年十二月宋公劉裕幽安帝於東堂而立恭帝靖
節和此歲暮詩蓋亦適當其時而寄此意焉首言市
朝耆舊之人莫不相為悲悽而其乘馬亦有悲泉懸
車之感且謂明旦已非今日予復何言其意深矣中
謂長風夕起寒雲沒山猛氣嚴而飛鳥還者以喻宋
公陰謀弑逆之暴而能使人駭散也篇末又言窮通
死生皆不足慮但撫我殊懷而踐此末運能不愧然

而增憤激也東澗湯漢曰陶公不事異代之節與子
房五世相韓之義同既不為狙擊之舉又時無漢祖
者可託以行其志所謂撫已有深懷履運增慨然亦
可以悲其志也矣

始作鎮軍叅軍經曲阿

鎮軍未詳何人曲阿晉縣名屬毘陵郡今其
地分屬鎮江府丹陽金壇等縣此詩按本集
篇次在隆安四年五月以前所作然或先後

不倫今既以四言居首姑依舊次不復更定

云

弱齡寄事外委懷在琴書被褐欣自得屢空去聲常晏如

時來苟冥

文選作
宜非是

會宛轡

集作
變誤

憩通衢投策命晨裝暫

與園田疎渺渺孤舟逝綿綿歸思紆我行豈不遙登降

一作
陟

千里餘目倦川塗異心念山澤居望雲慚高鳥臨

水愧游魚真想初在襟誰謂形跡拘聊且憑化遷終返

班生廬

賦也屢空數至匱乏也晏如謂不以貧乏累心而安然也冥會不求自至之意宛曲順貌築簡築也紆縈也化謂造化班生廬班固幽通賦云終保已而貽則里止仁之所廬靖節以親老家貧不得已而仕因經曲河之遠故作是詩言自少寄心於事為之外唯以琴書自娛不為貧窶所累今時苟冥會且宜宛轡亨衢蹕為一出夫何涉歷遠塗所見頓異不免歸思之紆而俯仰之際愧魚鳥之不若也然我真想在襟

豈為形跡所拘聊且順時而往終當歸隱焉爾

癸卯歲春懷古田舍

先師有遺訓憂道不憂貧瞻望邈難逮轉欲忘

集作志

長

勤秉來歡時務解顏勸農人平疇交遠風良苗亦懷新
雖未量歲功即事多所欣耕種有時息行者無問津日

入相與歸壺漿勞

去聲

近隣長吟掩柴門聊為隴畝民

賦也轉猶愈也忘長勤者樂於耕作不覺其勤也解
顏歡笑也懷新猶言欣榮問津謂孔子蓋以己比長

沮桀溺也

古人處畎畝之中躬耕樂道非若後世

徒為豐積者比靖節自辛丑歲七月於鎮軍幕赴假
還後日以耕稼自樂及賦此詩乃以懷古名題意有
在矣其言聖人憂道而不憂貧而我瞻望遠不易及
者蓋猶有飢餒之累不免務為農作而轉欲忘其長
勤也然既能忘其勤勞且耕且種即事歡欣如此其
於憂貧也復何有哉觀其日入而歸壺漿相勞之後
而又長吟以掩柴門則其氣象悠然有非言語可得

而形容者矣

庚戌歲九月中於西田穫早稻

西田即西廬之新疇也

人生歸有道衣食固其端

叶都方反

孰云

集作是非

都不營而

以求自安

叶於虔反

開春理常業歲功聊可觀

叶居真反

晨出肆

微勤日入負禾還

叶綠旬反

山中饒霜露風氣亦先寒

叶胡干反

田家豈不苦弗獲辭此難

叶那公反

四體誠乃疲庶無異患

千

叶經天反

盥濯息簷下斗酒散襟顏

叶槐堅反

遙遙沮溺心千

載乃相關

叶圭
玄反

但願長如此躬耕非所歎

叶宅
涓反

賦也歸趣也端事之首也肆縱也盥滌手濯濯足也

此言蠶桑以為衣耕稼以為食固亦人道所當為者誰謂都無所營而以求自安耶故下文歷叙春種秋穫田家艱苦之事且又言四體雖疲庶無它禍相及而於作勞之暇盥濯休息斗酒勸飲此與沮溺之心千載相關非常人所能識者故但長願如此則勤苦非所卹矣

飲酒十首

并序

余閒居寡歡兼

比毘至反

夜已長偶得名酒無夕不飲

顧影獨盡忽焉復醉既醉之後輒題數句自娛紙墨

遂多詞無詮次聊命故人書之以為歡笑爾

衰榮無定在彼此更

平聲

共之邵生瓜田中寧似東陵時

寒暑有代謝人道每如茲達人解

胡買反

其會逝將不復

疑忽與一觴酒日夕歡相持

賦也邵平事已見阮籍詩解通曉也會謂一理渾合

之處逝往也 靖節退歸之後世變日甚故每每得
酒飲必盡醉賦詩以自娛此昌黎韓氏所謂有託而
逃焉者也首篇言人之衰榮相仍與寒暑更相代謝
一理而已惟達生之人能解其會順時而進退逝將
不疑若世之貪榮利者徃徃不悟而自致汙辱今我
忽得與此杯酒日夕歡持者庶幾免夫蓋自慶之詞
也且邵平不事二代甘分田野故託以自況其旨微
矣

積善云有報夷叔在西山

叶翰
旃反

善惡苟不應何事空立

言九十行帶索飢寒况當年不賴固窮節百世誰當傳

賦也積善有報易云積善之家必有余慶與書伊訓

之言畧同帶索謂裘敝而以繩索聯結也列子曰榮

啓期行年九十鹿裘帶索鼓琴而歌言積善之報

聖經所云若伯夷叔齊餓於首陽之下則是空言無

應而天道有不可曉者矣且榮啓期年至九十猶不

免行而帶索則前乎此者其飢寒艱苦從可知焉向

使不能固守其節豈得垂名於後世哉此不惟靖節
自明其志亦足以為窮士之勸也

道喪向千載人人惜其情有酒不肯飲但顧

一作顧

世間

一作間

名所以貴我身豈不在一生一生復能幾條如流

電驚鼎鼎百年內持此欲何成

賦也情謂心之所欲鼎鼎太舒緩貌語出檀弓此

言大道久喪情欲日滋當世之人不肯適性保真而
徒戀惜世榮殊不知一生之內倏如電之過目今乃

舒緩怠惰不自速悟持此以往欲何所成而垂名乎
蓋不特以之諷人亦以自警焉爾

結廬在人境而無車馬喧問君何能爾心遠地自偏采

菊東籬下悠然見南山

叶輸
梅反

山氣日夕佳飛鳥相與還

旬緣反此間有真意欲辨已忘言

賦也君靖節自謂爾語詞偏僻靜也 此篇乃寫其

休閒自得之趣言心志超遠不為塵物所滯則目曠
耳清雖居人境自無喧雜矣故於東籬采菊之際悠

然見夫南山初不經意而景與意會況山氣日夕清
佳而飛鳥亦相與還各遂其自然之性則我於此豈
不陶然自樂也哉夫鳥倦飛則知還人不得志則卷
而懷之此意甚真人莫之察然欲與之辨則又有非
言說可得而盡者意味含蓄最宜潛玩

秋菊有佳色裛露掇其英汎此忘憂物遠

去聲我違集作遺誤

世情一觴雖獨進杯盡壺自傾日入羣動息歸鳥趨林
鳴嘯傲東軒下聊復得此生

賦也褱以衣去露掇采也忘憂物謂酒也遠祛之使
遠去也嘯傲舒嘯而寄傲得猶遂也靖節嘗言世
與我而相違今既得名酒又必采佳菊以汎觴者特
以遠此違世之情耳且林鳥尚知時而歸息今我嘯
傲於東軒之下豈不為得吾生哉蘇子瞻曰靖節以
無事為得此生則見役於物者非失此生耶

青松在東園衆草沒奇姿凝霜殄異類卓然見高枝連
林人不覺獨樹衆乃奇提壺撫

集作
挂誤

寒柯遠望時復為

吾生夢幻間何事繼塵羈

興也殄滅也撫摩也亦相慰之意夢幻字見釋氏書
言見青松之在東園初為衆草所沒而人不覺其
竒及卓立於凝霜凋落之餘然後貞操可見因思已
之仕晉不免汨於衆人之中及見彼皆屈節以附宋
然後吾之特立獨行者乃為異耳故我每見此松則
必為之興感或提壺往酌其下撫寒柯而盤桓或在
遠望亦復舉酒而為對焉且謂吾生如夢幻耳何故

乃受人之羈繫耶此蓋追思既往之非以慶今日安節保身之樂也

清晨聞扣門倒裳往自開

叶祛其反

問子為誰歟田父有好

懷

叶胡威反

壺漿遠見候疑我與時乖

叶公回反

襁褓茅簷下未

足為高棲一世皆尚同願君汨其泥深感父老言稟氣

寡所諧

叶弦鷄反

紆轡誠可學違已詎非迷且共歡此飲吾

駕不可回

叶胡威反

賦也倒顛倒也襁褓衣破弊貌同謂同乎流俗汨通

作渥撓亂也楚辭漁父曰世人皆濁何不渥其泥而
揚其波紆屈詎豈也迷謂昧於理此詩本為飲酒
而作然當時鄉曲之人適有相過候問勉其出仕者
故因與共飲且述彼意之勤懇在我之可否以成此
篇蓋其素志已定又安肯違已而徇人也哉

在昔曾遠遊直至東海隅道路迴且長風波阻中塗此
行誰使然似為飢所驅傾身營一飽少許便有餘恐此
非名計息駕歸閒居

賦也東海隅指曲阿以東而言蓋其地在宋為南東
海郡風波以喻世道之艱險傾身猶言盡力也 此
篇追言昔日為貧而仕當國步艱難之時遠經險阻
而所須不過一飽而已要之恐非良計故不若息駕
而歸隱殆亦知足知止之言也

故人賞我趣挈壺相與至班荆坐松下數斟已復醉父
老雜亂言觴酌失行次不覺知有我安知物為貴悠悠
迷所留酒中有深味

賦也班荆謂析荆布地而坐父老即所謂故人也行觴也靖節雖嗜酒家貧不能常得忽遇田父野老挈壺而至輒相與班坐林間飲酌盡醉且言既醉之後不自知其有我又安知外物之為貴是以悠悠然迷其出處任身所留其酒中之有深味也如此詳此則靖節真所謂託酒而逃焉者矣

羲農去我久舉世少復

房六反

真汲汲魯中叟彌縫使其

淳鳳鳥雖不至禮樂輒得新洙泗輟微響漂流建狂秦

詩書復何罪一朝成灰塵區區諸老翁為事誠殷勤如
何絕世下六籍無一親終日馳車走不見所問津若復
不快飲空負頭上巾但恨多謬誤君當恕醉人

賦也復反也真者無偽之名汲汲急貌魯中叟孔子
也彌縫謂補滿其闕漏鳳鳥不至孔子自歎之詞蓋
不得位以行其政教則聖王之瑞不見也洙泗魯二
水名輟止微妙也輟微響猶劉歆所謂夫子沒而微
言絕也狂秦指始皇焚書坑儒之時諸老翁謂漢伏

生孔安國毛公諸儒昌黎韓氏言羣儒區區修補者亦此意也六籍易書詩禮樂春秋是也快稱意也頭上巾史言其取頭上葛巾漉酒漉畢還復著之以已體人曰恕此言上古之時淳朴無偽自世降而俗漓少有能復其真者賴孔子出汲汲為之彌縫雖不得位而禮樂暫為一新自洙泗輟響而典籍壞於狂秦漢興諸儒區區修補於煨燼之餘誠亦勤矣如何後世無有能親之者惟見終日奔走以趨勢利安有

以道思濟天下如孔子之問津者焉則是道喪至此極矣又焉得不託於酒而決飲耶但恐醉人常多謬誤見者恕之可也西山真氏謂淵明之學自經術中來今觀此詩所述蓋亦可見況能剛制於酒雖快飲至醉猶自警飭而出語有度如此其賢於人遠矣哉

擬古五首

凡靖節退休後所作之詩類多悼國傷時託諷之詞然不欲顯斥故以擬古雜詩等目名

其題云

榮榮窗下蘭密密堂前柳初與君別時不謂行當久出
門萬里客中道逢嘉友未言心相醉不在接杯酒蘭枯
柳亦衰遂令此言負多謝諸少年相知不忠一作中厚意
氣傾人命離隔復何有

比也君謂晉君心醉即前詩迷所留之意語出列子
傾人命猶言傾倒肺肝也靖節見幾而作由建威
叅軍即求為彭澤令未幾賦歸及晉宋易代之後終

身不仕豈在朝諸親舊或有諷勸之者故作此詩以
寄意歟言蘭與柳本皆易衰之物猶且榮茂如此以
喻吾室雖弱尚可望其有為故我初與君別之時不
自謂久違於外但一出門即為遠客且逢嘉友同心
相親遂迷所留況至於今蘭枯柳衰所望者絕使我
初心既負而意向已決然矣然多謝諸子莫不以我
離隔既久而猶有所動念是何相知之不忠厚耶若
能意氣傾倒深體吾憂國之誠出處之義則知離隔

之念復何有哉語意含蓄讀者詳之

東方有一士被服常不完三旬九遇食十季著一冠辛

苦無此比常有好奇顏

叶倪干反

我欲觀其人晨去越河關

叶圭九反

青松夾路生白雲宿簷端知我故來意取琴為我

彈上絃驚別鶴下絃操

七到反

孤鸞顛留就吾住從今至

歲寒

賦也三旬九食十年一冠猶莊子言曾子居衛三日

不舉火十年不製衣之意上弦下弦猶言初曲終曲

驚乍聞之貌別鶴孤鸞並琴曲名操劉向別錄云其道閉塞悲愁而作者名其曲曰操言不失其操也

此靖節安貧自樂之詩言東方一士其貧苦若此而常有好容顏者以其能自養而憂患不足以累心也故我往造其居見其所與偶者惟青松白雲而已且為我取琴而彈別鶴孤鸞者蓋以此心幽獨人莫之知似有鸞鶴久離思見其侶之意是以我亦願留就住以至於老此皆假設之詞以寓己意云爾非必真

有此士也

日暮天無雲春風扇微和佳人美清夜達曙酣且歌歌
竟長歎息持此感人多皎皎雲間月灼灼葉中華

叶呼反

豈無一時好不久當如何

此也佳人猶楚詞稱美人蓋託意於君也美之言媚
也達通曙旦也樂酒曰酣此詩殆作於元熙之初
乎日暮以此晉祚之垂沒天無雲而風微和以喻恭
帝暫遇開明溫煦之象清夜則已非旦晝之景而達

曙則又知其為樂無幾矣是時宋公肆行弑立以應
昌明之後尚人二帝之議而恭帝雖得一時南面之
樂不無感歎於懷譬猶雲間之月行將掩蔽葉中之
華不久零落當如何哉其明年六月果見廢為零陵
王又明年被弑此靖節預為憫悼之意不其深歟

少時壯且厲撫劍獨行遊誰言行遊近張掖至幽州飢

食首陽薇渴飲易水流不見相知人惟見

一作純是

古時丘

路邊兩高墳伯牙與莊周此士難再得吾行欲何求

賦也張掖晉涼州郡名即今甘州也幽州古燕國易水燕太子丹送荆軻處在今易州易縣此晉亡已後憤世之詞託言少時撫劍北遊飢食首陽之薇渴飲易水之流者以寓夷齊耻食周粟荆軻為燕報仇之意也然此義在心今人既無相知古人又難再得則吾此行尚欲何求哉湯漢曰說苑謂鍾子期死伯牙絕絃破琴知世莫可為鼓也惠施卒莊子深瞑不言見世莫可與語也今靖節雖有伯牙之琴莊周之

言而無能聽之者因見二士之墳而有感焉此其所
以罷遠遊也

種桑長江邊三年望當米枝條始欲茂忽值山河改柯
葉自摧折根株浮滄海春蠶既無食寒衣欲誰待本不
植高原今日復何悔

上聲

比也此亦靖節因晉亡而歎已之失望也其意謂為
學既久德業甫成而祿在其中夫何世代遷革使我
志意摧沮踪跡遠寄而失代耕之望耶然我生不幸

不得逢堯舜之世而遭此末運今日復何悔哉且不
敢直述故借種桑江邊為喻其旨微矣

雜詩二首

白日淪西河素月出東嶺遙遙萬里輝蕩蕩空中景風
來入房戶夜中枕席冷氣變悟時易不眠知夕永欲言
無予和去聲揮杯勸孤影日月擲人去有志不獲騁念此
懷悲悽終曉不能靜

比也蕩蕩廣遠貌和應答也擲拋也騁馳騫也不能

靜者亦展轉反側之意 此蓋靖節初聞朝廷禪草
之事而深懷憤恨之詞言白日淪沒以喻恭帝之見
廢月出而輝暎廣遠以比宋武稱受禪而有天下也
且謂風冷氣變時改夕永者則其慘愴之情可知矣
當此之際羣臣莫不奔趨而附麗之竟無可晤語者
惟與孤影為偶揮杯相勸以自適耳然時不我與雖
欲撥亂反正而志不獲申徒懷悲悽終曉不能安寢
也靖節退休既久而忠憤感發形於言詠蓋有不容

自己者爾

代耕本非望所業在田桑躬親未曾替寒餒常糟糠豈

期過滿腹但願飽粳糧御

通作

冬足大布簾絺以應去聲陽

止

或改作正不
如止字意切

爾不能得哀哉亦可傷人皆盡獲宜拙

生失其方理也可奈何且為去聲陶一觴

賦也代耕仕祿也孟子曰祿足以代其耕替廢也糟

糠史記云民褐衣不完糟糠不厭大亦簾也葛之細

者曰絺簾者曰綌陽炎暑也宜便利也方猶計也

此蓋自悼其貧乏而且自遣也言祿仕既非所望惟業於田桑躬親靡替猶不免凍餒之道且所願易足不過粳糧一飽簾布以應寒暑而已於此尚不能得此其所以為可哀也夫人巧於希世盡皆獲宜而我拙於生事獨失所措此亦理之當然無可奈何惟以一觴陶寫性情而任其自然耳

詠貧士

萬族各有託孤雲獨無依曖曖空中滅何時見餘暉朝

霞開宿霧衆鳥相與飛遲遲出林翮未夕

一作反

復來歸

量力守故轍豈不寒與飢知音苟不存已矣何所悲

比也族類也故轍古人之跡也此亦靖節更歷世

變安貧守節而歎人之莫我知也言衆人各得其所

而已獨窮困無賴恐沒世而無聞譬猶飛潛動植之

物各有所託而孤雲獨飄飄無依行將滅於空中不

復可見矣且所謂朝霞開霧喻朝廷之更新衆鳥羣

飛比諸臣之趨附而遲遲出林未夕來歸者則自況

其審時出處與衆異趣也我於此時固守不易甘分
飢寒如此苟無知音者存亦自己矣夫復何悲此真
所謂樂夫天命而不疑者歟

詠荆軻

燕丹善養士志在報強嬴招集百夫良歲暮得荆卿君
子死知己提劍出燕京素驥鳴廣陌慷慨送我行雄髮
指危冠猛氣衝長纓飲餞易水上四座列羣英漸離擊
悲筑宋意唱高聲蕭蕭哀風逝淡淡寒波生商聲更

平聲

流涕羽奏壯士驚心知去不歸且有後世名登車何時
顧飛蓋入秦庭凌厲越萬里逶迤過千城圖窮事自至
豪主正怔征音營惜哉劍術疎部功遂不成其人雖已沒
千載有餘情

賦也燕丹燕王喜之太子嬴秦之姓也荆卿名軻按
史記燕丹初質於秦秦王政遇之不善丹怨而亡歸
使荆軻挾匕首往報仇素驥太子及賓客送軻至易
水上皆白衣冠故馬亦稱素也筑樂書云似第十三

絃頸細而曲以竹鼓之如擊琴然宋意淮南子言其
從高漸離擊筑而歌者商音羽奏謂軻和而歌為變
徵之聲士皆涕泣又歌風蕭蕭易水寒之詞為羽聲
慷慨士皆瞑目髮上指冠圖窮謂獻以燕督亢地圖
秦王發圖窮而匕首見秦王驚環柱走避軻刺之
不中遂為其左右所殺怔營惶恐不安之貌疎謂不
精也 此靖節憤宋武弑奪之變思欲為晉求得如
荆軻者往報焉故為是詠觀其首尾句意可見晦庵

朱子曰人皆謂淵明詩平淡不覺其豪放惟詠荊軻一篇始見本相非平淡人所能道斯言信矣

讀山海經

山海經凡十八篇劉歆校定多載海內外絕域山川人物之異王充論衡及吳越春秋皆以為禹治水無遠不至凡所見聞伯益疏而記之後郭璞為註并圖讚

孟夏草木長

上聲

遶屋樹扶疎衆鳥欣有託吾亦愛吾廬

既耕亦已種時還讀我書窮巷隔深轍頗迴故人車歡

言

一作然

酌春酒摘我園中蔬微雨從東來好風與之俱

汎覽周王傳流觀山海圖俯

一作倦

仰終宇宙不樂復何

如

賦也疎通作䟽扶疏枝華盛貌迴迂汎廣也周王傳

穆天子傳也按文獻通考晉太康二年汲郡民發古

塚所得四方上下曰宇古往今來曰宙 此詩凡十

三首皆記二書所載事物之異而此發端一篇特以

寫幽居自得之趣爾觀其衆鳥有託吾愛吾廬等語
隱然有萬物各得其所之妙則其俯仰宇宙而為樂
可知矣

桃源詩

桃源本東漢縣名屬武陵郡按武陵即今湖
北之常德府

嬴氏亂天紀賢者避其世黃綺之商山伊人亦云逝往
迹寔復湮來邈遂蕪廢相命肆農耕日入從所憩桑竹

垂餘蔭菽

一作黍

稷隨時藝春蠶收長絲秋熟靡王稅荒

路暖交通鷄犬互鳴吠俎豆猶古法衣裳

一作冠

無新制

童孺縱行歌斑白歡游詣草榮識節和木衰知風厲雖

無紀歷誌四時自成歲怡然有餘樂於何勞智慧奇踪

隱五百一朝敬神界

叶居吏反

淳薄既異源旋復還幽蔽借

問遊方士焉測塵囂外

叶魚計反

願言躡輕風高舉尋吾契

賦也天紀書脩征云倣擾天紀即洪範所謂歲月日

星辰歷數是也黃綺見前飲酒篇寢益湮沒也菽大

豆也靡無也曖迷亂貌互者彼此相聞也孺幼穉之
稱斑白老人頭半白黑者詣造于於也慧巧謀也五
百自秦至晉之年數敞啓境界也囂喧聲遊方士莊
子所謂遊方之外者吾契即桃源之人也靖節因
作桃花源記并係此詩其記謂晉太元中武陵人緣
溪捕魚忘路之遠近忽逢桃花林夾岸數百步盡水
源得一山山有小口便捨舟入行數十步豁然開朗
其中屋舍鷄犬種作衣著悉如外人自言先世避秦

亂率妻子邑人來此不復出焉問今是何世各延至
家為設酒食留數日辭歸詣太守說其事即遣人隨
往尋向所誌遂迷不復得詩之意蓋謂塵外有此淳
朴絕境神閤莫通今世道漸亂有似於秦思欲高舉
相尋以就深隱云爾 蘇子瞻曰世傳桃源事多過
其實故淵明所記止言先世避秦來此則漁人所見
似是其子孫非秦人不死者也蜀青城山有老人村
道極險遠生不識鹽醢其人多壽至有五世孫者近

歲道稍通漸能致五味而壽益衰常意天壤間若此者甚衆不獨桃源也

挽歌詩

集作擬挽歌詞趙山泉曰此作於將逝之時
梁昭明采此入選止題曰挽歌詩而編次本
集者乃以為擬作誤矣

荒草何茫茫白楊亦蕭蕭嚴霜九月中送我出遠郊四
面無人居高墳正嵯嶢馬為仰天鳴風聲自蕭條幽室

一已閉千年不復朝千年不復朝賢達將

一作無

奈何向

來相送人各自

一作已

還其家

叶居何反

親戚或餘悲它人亦

已歌死去何所道

去聲

託體同山阿

賦也九月中按靖節自祭文云律中無射正與此合

嵯峨高起貌

祈寬曰昔人自作祭文挽詩者皆寓

意騁詞成於暇日今攻此靖節詩文乃絕筆於祭挽

二篇蓋並出於一時屬續之際其於晝夜死生之道

了然如此可謂達矣要之自孔子曳杖之歌曾子易

簣之言已後如靖節此詞亦不多見矣

風雅翼卷五

欽定四庫全書

風雅翼卷六

元 劉履 編

選詩補註六

宋詩一

謝靈運陳郡陽夏人以祖父並葬始寧縣遂移籍
會稽晉孝武時襲封康樂公安帝元興初為琅邪
王參軍累遷黃門侍郎時宋公位相國以為從事

中郎遷世子左衛率坐事免及宋受禪降公爵為
侯起為散騎常侍轉太子左衛率武帝崩出為永
嘉太守在郡辭歸始寧文帝登阼徵為秘書監遷
侍中未幾復稱疾歸好尋山陟險會稽太守孟顗
表其有異志帝惜其才授臨川內史復為有司所
糾降死徙廣州尋以事詔就廣州棄市年四十九
述祖德詩二首

按靈運祖玄字幼度太傅安之兄子晉孝武

時為征西司馬詔求文武良將安以玄應徵
拜建武將軍監江北諸軍事尋加號冠軍領
徐州牧及為前鋒都督建淮肥之功加七州
都督封康樂公後以疾乞歸東山授會稽內
史卒贈車騎將軍謚曰獻武

達人貴自我高情屬天雲兼抱濟物性而不纓垢氛

叶孚

因反段生蕃

通作藩

魏國展季救魯人弦高犒

口倒反

暗

舊作晉誤

師仲連却秦軍臨組乍不緹對珪寧肯分

叶孚因反

惠物辭

所賞勵志故絕人

重韻

苔苔歷千載遙遙播清塵清塵竟

誰嗣明哲垂經綸委講綴

當作輒偏旁之誤

道論改服康世屯

屯難

去聲

既云康尊主隆斯民

賦也屬著也纓與嬰同垢塵滓所集氛則浮塵常飛

而不見者段生仲連並見左太冲詩展季名獲字禽

魯大夫柳下惠也莊子戰國策並稱柳下季救魯人

按左氏傳齊孝公伐魯北鄙僖公使展喜受命於展

禽往犒師齊侯曰魯人恐乎對曰昔周公太公股肱

周室夾輔成王成王賜之盟曰世世子孫無相害也
君必不棄命廢職恃此以不恐齊侯乃還弦高鄭之
商人呂氏春秋云秦將興師伐鄭弦高遇之乃矯鄭
伯之命犒勞以璧膳以十二牛秦三師對曰寡君使
某也於邊候暗之道迷惑陷入大國之地高誘曰暗
國名也犒餉軍也莒莒高遠貌清塵猶言清風楚詞
云聞赤松之清塵經綸治絲之事借以喻經理天下
之功用也 靈運欲稱述祖德先言古者賢達之人

貴自我而不係於物故其高情屬天雖有濟物之功
不受爵賞所以迥異於人歷千載而莫及惟我祖車
騎既明且哲素抱經綸之才一聞徵詔即委輟朋好
講論之務更著戎服以匡世難尊主而隆民為能繼
嗣昔人之清塵也詳具下篇

中原昔喪亂喪亂豈解已崩騰永嘉末逼迫太元始河

外無反正江介有賊

同

圯萬邦咸震懾

質涉反

橫去流賴

君子拯溺由道精龕暴資神理秦趙欣來蘇燕魏運

去聲

文軌賢相謝世運遠圖因事止高揖七州外拂衣五湖
裏隨山疏濬潭傍岸藝枿梓道情舍塵物貞

劉涓子云
即作正字

讀
觀丘壑美

賦也崩騰崩壞而騰沸也永嘉晉懷帝年號太元晉
孝武年號河外指洛陽西晉所都反正謂撥亂而反
之正也江介江淮之間東晉所有之地蹙促狹也懾
懼也橫流喻禍亂君子指車騎也道情謂拯溺之情
由道心而發者龕通作戲勝也資猶藉也神理言一

理應變神妙不測也秦趙符堅所據之地燕魏慕容
所據之地也文軌謂車書之所及賢相太傳也靈運
山居賦自註云太傳既薨遠圖已輟揖謝去之貌七
州謂都督所領徐兗青司冀幽并也五湖張勃吳錄
云太湖之別名國語云范蠡返至五湖而辭越疏通
濬深藝種也枌白榆也塵物謂軒冕之屬此篇言
自劉聰石勒作豐於永嘉之末至符監侵迫於太元
之始中原喪亂無時解息且河外既沒於秦而江淮

之地人日摧陷於時中外莫不震懼所賴吾祖大破秦兵於淝上得免橫流之禍其後司豫兗青諸州漸次削平拯溺戡暴使近者悅遠者慕其功大矣夫何太傅在朝稍被讒間又與會稽王道子有隙遂出鎮廣陵尋以疾薨時既若此則雖有宏遠之圖已可因事而止於是拂衣蕃鎮歸隱東山遺棄世榮日以遊觀為樂可謂功成身退志同范蠡者矣

九日從宋公戲馬臺集送孔令

宋公武帝也晉義熙十四年始受命為宋公
戲馬臺在彭城項羽所築孔令名靖字季恭
會稽山陰人宋初建國以為尚書令固讓不
受因謝事東歸

季爍邊翔苦旅鴈違霜雪淒淒陽卉腓

音肥

皎皎寒潭絜

潔同

良辰感聖心雲旗興暮節鳴霞戾朱宮蘭卮獻時哲

錢宴光有孚和樂

音洛

隆所缺在宥天下理吹萬羣方悅

歸客遂海隅脫冠謝朝列弭棹薄枉渚指景待樂闋

音缺

河流有急瀾浮驂無緩轍豈伊川塗念宿心愧將別彼
美丘園道喟焉傷薄劣

賦也朔北地旅猶言來賓也腓病也詩云秋日淒淒
百卉具腓葭蘆也鳴葭者胡笳也以蘆為首竹為管
似膚篳但無竅耳晉先蠶儀注云凡車駕所止吹小
箛發吹大箛箛即笳也戾至也朱宮指戲馬臺所有
宮觀也蘭卮取其芳香而言時哲指孔令光言寵宴
而有光輝也孚者信存於中之義易云有孚于飲酒

隆者興之使盛也所缺謂君臣燕饗之禮詩六月序
云鹿鳴廢則和樂缺在寮宥寬也莊子曰聞在宥天
下不聞在治天下吹萬亦見莊子書司馬彪曰天氣
吹煦萬物使各得其性也弭止也薄猶泊也闋樂終
也浮行貌馬在旁為騶立園隱者遊樂之所喟嘆聲
劣弱也 宋公始建國彭城而孔令辭位歸鄉因九
日出遊戲馬臺以餞之百寮咸賦詩以述其美靈運
時為相國從事亦從而賦之其言君臣相孚燕飲和

樂而恩寵光輝有如此者蓋以公能寬宥天下吹煦
羣生使各得遂其所故孔令乃得謝事而歸休焉然
我於其將別而興感念者豈惟川塗分異而戀惜之
耶且初心縈想丘園之美顧以才氣薄劣不克自遂
是尤不免有愧而至於歎傷也

從游京口北固應詔

京口在今鎮江府丹徒縣孫權初鎮丹徒謂
之京城故有是名北固山名按水經註在京

城西北三面臨水因號北固

玉璽

想里反

戒誠信黃屋示崇高事為名教用道以神理

超昔聞汾水游今見塵外鑣鳴笳發春渚稅鑾登山椒

張組眺倒景列筵矚歸潮遠岩映蘭薄白日麗江皋平原

隰萋綠柳墟囿

音又

散紅桃皇心美陽澤萬象咸光昭顧

已枉維繫撫志慚場苗工拙各所宜終以反林巢曾是

縈舊想覽物奏長謠

賦也璽印也古者印璽通名尊卑共之秦漢以來唯

天子得稱璽又獨以玉也黃屋天子車蓋以黃繒為裏故以為名名教聖人之教命於萬世者也超迥出之意汾水游即莊子所言堯治天下往見四子於汾水之事璽鈴在鑣者稅駕則璽聲隨止故直云稅璽也山頂曰椒組帷之飾帶吳都賦云張組帷構流蘇倒景山臨水而影倒也蘭薄猶言蘭林麗光明貌蕘稚枝初生也苑有垣為園維繫場苗並借用詩白駒篇語以喻見用而食祿也林巢謂隱居也武帝即

位之後靈運時為散騎常侍從游北固應詔而作是詩言居至尊之位者玉璽所以驗誠偽黃屋所以嚴等威此二事特為名教之用耳若乃治化之道自有神機妙理超出於事為之外者焉且聞昔者帝堯尚有汾水之游今吾皇揚鑣塵外亦豈常情所能測哉然其所以登高眺玩而見夫陽景輝暎卉物鮮榮者莫非聖心仁澤之美遠近孚布而萬象無不光昭也詳此則羣臣之受恩寵者各遂所志意有在矣故下

文謙言已獨愚拙自宜歸隱山林顧乃枉見繫維徒
慚尸素以此縈想於懷已非一日今因覽物興感而
奏此長歌也

永初三年七月十六日之郡初發都

永初武帝年號是年五月帝崩少帝即位至
明年歲首始改元故此猶云永初也郡謂永
嘉即今溫州也

述職期蘭暑理棹變金素秋岸澄夕陰火旻團朝露辛

苦誰為

去聲

情遊子值頽暮愛似莊念昔久敬曾存故如

何懷土心持此謝遠度李牧愧長袖卻克慙

音

步良

時不見遺醜狀不成惡曰余亦走離依方早有暮生幸

休明世親蒙英達顧空班趙氏璧徒乖魏王瓠從來漸

二紀始得傍歸路將窮山海迹永絕賞心晤

賦也闌殘也金素謂秋也秋為旻天火旻言天至秋

而星火西流也團通作溥露多貌頽慕亦指秋時而

言似謂像其所識之人莊子曰越之流人去國踰年

見似人而喜曾存故韓詩外傳曾子謂久友交而中
絕為一費論語云故舊不遺先儒亦以為曾子之言
謝猶慙也李牧趙將也身大臂短初至趙使工人為
木杖以接手詳見戰國策卻克晉大夫躡跛也晉使
卻克徵會於齊頃公惟婦人使觀之卻子跛而登婦
人皆笑支離謂形體病不全正也莊子曰支離其形
者猶足全其天年況支離其德者乎方道也依方謂
學道即支離其德之意英達與下文賞心晤者並指

廬陵王也班猶舜典班瑞之班趙氏璧趙王和氏之
璧以喻美官也魏王瓠惠子謂莊子曰魏王貽我大
瓠之種樹成而實五石為其無用掊之莊子曰夫子
固拙於用大矣十二年為一紀歸路謂永嘉路次近
始寧也按廬陵王義真警悟好文與靈運及顏延
年情好款密靈運性褊傲自謂才能宜叅權要常懷
憤悒司空徐羨之等惡其與義真游因少帝即位出
為永嘉太守此詩雖以之郡而作大槩為與廬陵分

異而寓其感恩懷舊之情焉言性循其職本期末夏
今乃遲遲其行值此秋景豈無所為者哉夫見似而
愛所以念其疇昔者滋深交久而敬所以存其故舊
者不絕古人之遠度如此今我既託好廬陵如何持
此懷土之心遽忍違離不免有慚於古人也雖然我
本支離醜狀之人又將支離其德以全天年者不謂
遭逢幸會親蒙英達顧遇亦猶李牧之於趙邵克之
於晉也然徒賜以好爵既乖所用以此見出理固宜

矣況從筮仕以來漸及二紀今始得便還鄉且將窮探山水由是而永絕賞心之晤蓋有不得已焉者耳史言徐羨之奏靈運構扇異同非毀執政出之今觀是詩畧無怨恨非毀之意譜者之言未必皆實也

隣里相送至方山

方山在今江寧縣東五十里

祇役出皇邑指期憩甌越解纜及流潮懷舊不能發析析就衰林皎皎明秋月含情易為盈遇物難可歇積疴

謝生慮寡欲罕所闕資此永幽棲豈伊年歲別各勉日
新志音塵慰寂蔑

賦也祇敬奉也甌東甌越地即永嘉也纜繫船索析
析風動葉聲生慮浮生之俗慮闕失也音塵猶言音
信也寂蔑晦迹無聞之意靈運自京都之永嘉而

隣里有相送至方山者故作此詩為別言奉職遠行
因懷舊而不忍發既含此情又遇時物之變則其感
念於中豈得已耶然我為多病而謝去生慮由寡欲

而少所闕失者亦已久矣方將藉此永為幽棲之計
豈惟與爾年歲相別而已哉但當各勉日新其德庶
使得聞音塵而有以慰吾寂蒨之懷也

過始寧墅

始寧縣名屬會稽郡按後漢郡國志註分上
虞南鄉置焉會稽志云漢順帝時分置及隋
平陳廢入會稽縣今考其地在會稽上虞嶺
三縣之界野有田廬曰墅

東髮懷耿介逐物遂推

吐雷反

遷違志似如昨一紀及茲

年緇磷

音吝

謝清曠疲茶

居結反

慙貞堅拙疾相倚薄還得

靜者便

昆連反

剖竹守滄海枉帆過舊山

叶輸旃反

山行窮登

頓水涉盡洄沿巖峭嶺稠疊洲縈渚連緜白雲抱幽石
綠篠媚清漣葺宇臨迴江築觀基層巔揮手告鄉曲三
載期歸旋且為樹枌檟毋令孤願言

賦也物外物也推遷謂宿心變移也磷薄曠明也茶
疲貌莊子曰茶然疲役便宜也剖竹漢制與郡守符

信以竹為之長六寸各分其半以相合登頓登而復
頓也洄逆流而上沿順流而下也小洲曰渚釋名云
渚遮也能遮水使迴也篠小竹連小波也觀樓觀巔
山頂也檟材木可為櫬按會稽志東山西一里始
寧園乃靈運別墅一曰西莊蓋其祖父故宅在焉宋
史所謂傍山帶江盡幽居之美者也此詩因之永嘉
得過此而作言自少時即懷耿介不謂因物有遷違
志頗久蓋非清曠貞堅之質而執操不固可為慙謝

也所賴拙與疾相併以此出守海隅因此遂吾幽尋
故山之便於是登陟深峻窮覽景物脩營舊業增築
新基而後赴郡且與鄉里相別告之歸期使樹枌檟
於茲當不負此願言也

富春渚

富春本漢縣名屬吳郡北臨浙江即今富陽
縣也

宵濟漁浦潭旦及富春郭定山緬雲霧赤亭無淹薄遡

流觸驚急臨圻阻參

丑林反

錯亮乏伯昏分

扶運反

險過呂

梁壑存至宜便

平聲

習兼山貴止託平生協幽期淪躋

音致

困微弱久露干祿請始果遠遊諾宿心漸申寫萬事俱
零落懷抱既昭曠外物徒龍蠖

賦也漁浦浙江浦名在今蕭山縣去富春三十里城
外曰郭定山赤亭皆傍山江名觸犯也圻與碕同曲
岸頭也參錯岸名巖險之狀伯昏莊子稱伯昏無人
與列禦寇射登高山履危石臨百仞之泉而禦寇不

能從者是也分猶量也石絕水為梁呂梁在今徐州
境內酈道元謂呂梁之石崇竦河流激盪震動天地
壑水深險處洊仍也習重習也易云水洊至習坎此
言凡事遇險必重習然後熟而安之也兼山艮卦之
象艮止也貴止託者謂時止則止也協意合也躓頓
果遂也諾心許之詞零落猶言脫落也蠖尺蠖蟲名
行則屈後以伸前易曰尺蠖之屈以求伸也龍蛇之
蟄以存身也靈運自始寧墅將赴永嘉由浙江沂

流而上每遇山水佳處輒留詠紀之此篇言夜渡漁浦旦及富春其間名山或為雲霧隔遠或以舟行疾速皆不及盤桓登覽又况湍驚岸絕莫可臨陟而我信無伯昏之量故視此險以為過於吕梁也然不涉險難則無以知習坎之義不覩兼山則無以識艮止之時顧我平生雖協幽隱之期而乃因頓微弱不自勇決不免久請干祿屢更坎險今幸因此出守始遂遠遊而知所止託使宿心漸得舒寫塵累既去則懷

抱自然昭曠而屈伸顯晦無足道矣

晚出西射堂

西射堂在水嘉郡城西南十里

步出西城門遙望城西岑連嶂疊巘崿青翠杳深沉曉
霜楓葉舟夕曛嵐氣陰節徃感不淺感來念已深羈雌
戀舊侶迷鳥懷故林含情尚勞愛如何離賞心撫鏡華
緇鬢攬帶緩促衿安排徒空言幽獨賴鳴琴

賦也嶂山橫列如屏障者嶽山峯崿崖也曛日入餘

光也山氣曰嵐華白貌衿通作襟排者推移之謂莊
子曰安排而去化謂安於推移與化俱去也幽獨謂
窮獨也嵇康琴賦序云處窮獨而不悶者莫近於音
聲靈運被譖出守常不得意因步出射堂而作此
詩言眺望城西見物候之變而知節徃則憂思已不
淺矣況感鳥之含情者尚勞愛戀則我如何離去賞
心之人能不深念乎哉且於撫鏡攬帶之頃又知其
漸至老瘦如此雖欲遺情委化而不可得然必善處

而使之無悶惟賴鳴琴以自遣耳

登池小樓

潛蚪媚幽姿飛鴻響遠音

博音

霄愧雲浮棲川怍淵沉

進德智所拙退耕力不任
徇祿反窮海卧病對空林
衾枕昧節候寨開暫窺臨
傾耳聆波瀾舉目眺嶮嶽
欽初景草緒風新陽改故
陰池塘生春草園柳變鳴
禽祁祁傷幽歌萋萋感楚
吟索居易永久離羣難處
心持操豈獨古無悶徵在
今

興也虬龍無角者幽姿潛隱之姿也飛鴻李善呂延
濟皆以為高飛遠害獨曾原取鴻漸奮飛之義謂與
進德一句相應當從其說水流者曰川不流曰淵作
慙也進德謂進施其德於位也以身從物曰徇反即
前篇傍歸路之意褰猶掀也嶇欽指山而言初景新
春之景草更易也緒風餘風也楚詞云欽音哀秋冬之
緒風祁祁舒徐貌幽歌幽七月詩云春日遲遲采蘩
祁祁女心傷悲殆及公子同歸楚吟楚詞招隱云王

孫遊兮不歸春草生兮萋萋皆感時懷人之詞也處
置徵驗也 靈運自七月赴郡至明年春已踰半載
因病起登樓而作此詩言蚪以深潛而自媚鴻能奮
飛而揚音二者出處雖殊亦各得其所矣今我進希
薄霄則拙於施德無能為用故有愧於飛鴻退效棲
川則不任力耕無以自養故有慙於潛蚪也夫進退
既已若此未免徇祿海邦至於卧病昏昧不覺節候
之易今乃整得臨眺因覩春物更新則知離索既久

而感傷懷人之情自不能已蓋是時廬陵王未廢故
念及之且謂窮達離合非人力所致唯執持貞操樂
天無悶豈獨古人為然當自驗之於今可也

遊赤石進帆海

赤石永嘉地名靈山遊名山志云永寧安固
二縣間東南便是赤石又枕海按輿地廣記
永寧即今溫州之永嘉縣安固作安國即瑞
安縣也

首夏猶清和芳草亦未歇水宿淹晨暮陰霞屢興沒

莫叶

列反周覽倦瀛壖

而宜反

況乃凌窮髮川后時安流天吳靜

不發揚帆采石華掛席拾海月溟漲無端倪

音厓

虛舟有

超越仲連輕齊組子牟眷魏闕矜名道不足適已物可

忽

叶許月反

請附任公言終然謝天伐

賦也陰霞已見張景陽詩瀛壖緣海餘地陵侵入

也窮髮不毛之地莊子曰窮髮之北有溟海者天池

也川后波神洛神賦云川后靜波天吳水伯八首八

足八尾見山海經石華海月並水物臨海志云石華
附石生肉可啖海月大如鏡白色又見郭璞江賦席
即帆也端倪猶言涯際也仲連輕齊組史記云田單
攻聊城不下連乃為書約之矢射城中燕將得書自
殺遂屠聊城齊王欲爵之連逃隱於海上子牟魏公
子名牟嘗謂瞻子曰身在江海之上心居魏闕之下
言未能忘富貴也矜自飭也適已謂自得於己忽輕
也忘也任公太公任也莊子曰孔子圍於陳太公任

往弔之曰直木先伐甘泉先竭子其意者飾智以驚
愚昭昭若揭日月而行故不免也天伐即先伐之謂
史言靈運出守既不得志遂肆意遊遨山水徧歷諸
縣動踰旬朔所至輒為詩詠此游海一篇亦其證也
其言首夏於舟中淹宿連日周覽瀛壖亦已倦矣况
乃深入無涯之溟漲乎是時風波恬靜玩物夷猶不
覺超越之遠因思魯連魏牟之在海上者一則戀闕
矜名而於道為不足一則任真自適而於物無所係

二者之趨已判然可識更請益以太公任之言則終
能謝去天伐而全吾生矣其後靈運在臨川為有司
所糾遣使收之乃興兵逃逸作詩曰韓亡子房奮秦
帝魯連耻竟以此自致天伐徒為空言而不能踐惜
哉

初去郡

彭薛裁知耻貢公未遺榮或可優貪競豈足稱達生伊
予秉微尚拙訥謝浮名廬園當

去聲

棲巖卑位代躬耕顧

已雖自許心跡猶未并無庸方

舊本作妨誤

周任有疾像長

御畢娶類尚子薄遊似邵生恭承古人意促

一作傲

裝返

柴荆牽絲及元興解龜在景平負心二十載於今廢將

迎理棹遙還期遵渚驚脩坳遡溪終水涉登嶺始山行

野曠沙岸淨天高秋月明憇石挹飛泉攀林蹇落英戰

勝臞者肥鑒止

舊作止鑒

流歸停即是義唐化獲我擊壤情

一作聲非

賦也彭薛漢彭宣薛廣德也宣哀帝時為大司空廣

德元帝時為御史大夫許乞骸骨歸鄉里班固曰廣德保懸車之榮宣見險而止近於知恥裁通作纔僅也貢公名禹宣帝時為河南令以職事為府官所責免冠謝且曰冠一免安可復冠遂去職及元帝即位復為諫大夫既而上書乞骸骨帝留之復為御史大夫優勝也貪競如楚詞所謂競進而貪婪者達生謂以無心處世感而後應不累於物者也莊子有達生篇伊發語詞尚高尚也方此也周任古之良史嘗言

陳力就列不能者止此言無庸即不能之謂長卿司馬相如也有消渴疾免官居茂陵尚子嵇康高士傳云尚長字子平男女嫁娶畢勅斷家事肆意遊五嶽名山尚後漢書作向薄遊薄為宦遊也邴生名丹字曼容亦西漢人為官不肯過六百石輒自免去柴荆謂柴門牽絲猶言紆組綰綬元興晉安帝年號是時初為琅邪王參軍龜印鈕也解龜謂解印去官景平宋少帝年號將送遄速也林外曰坰擗取也戰勝韓

非子子夏曰吾人見先王之義則榮之出見富貴又榮之二者戰於胷中故懼今見先王之義勝故肥臞瘠也鑒止莊子曰人莫鑒於流水而鑒於止水停通作渟水止處也擊壤之制已見曹子建詩王充論衡云堯時有老人擊壤於塗觀者曰大哉堯之德也擊壤者曰吾日出而作日入而息鑿井而飲耕田而食堯何力於我哉按靈運在郡一周稱疾去職此詩當是在塗中作言彭薛貢公雖各辭榮而不能無意

故未足為達生子既無心功名素懷栖遯顧乃猶為
形跡所累未遂其心焉因思周任言不能則止相如
得謝病家居尚子畢娶而遊邴生薄遊輒免凡茲古
人之意我皆似之故今亦決其歸計而促裝也且又
追念初仕以來負心既久今乃始廢將迎之勞得遵
歸路於是登涉俯仰怡情景物此心悠然莫非天趣
是知閒逸足勝仕宦譬諸鑒水當不於其流而於其
止也此即羲皇陶唐雍熙之化而當時擊壤者則已

先得我之歡情矣

田南樹園激流植援

田南按水經註靈運祖車騎有田居在太康湖疑即此處所謂始寧墅也樹種植也援張銑曰衛也植木當墉以為衛也

樵隱俱在山由來事不同不同非一事養痾亦園中中

園屏

上聲

氛雜清曠招遠風卜室倚北阜啓扉面南江

姑叶

紅反

激澗代汲井挿槿當去聲列墉羣木既羅戶衆山亦對

窗

叶音

靡迤

反移兩

趨下田迢遞瞰高峯寡欲不期勞即

事罕人功唯開蔣生徑永懷求羊蹤賞心不可忘妙善

冀皆

一作能

同

韻重

賦也屏除也激猶引也靡迤猶邈迤連接也迢遞高

遠貌瞰視也蔣生徑三輔決錄云蔣詡隱居社陵竹

下開三徑唯故人羊仲求仲二人從之遊妙善謂樂

道自得之趣郭象莊子註有妙善同之語靈運始

歸居石壁既又卜室田南後因役工而作此詩且言

中國清曠有江山林泉之勝樹藝趨田日以為樂然
吾所以寡欲正不期於勞役即此田園之事亦少工
用唯效昔人開徑以來朋好焉耳蓋賞心之人自不
可忘故欲與之同此妙善也史言靈運既移籍會稽
與隱士王弘之孔淳之等放意為娛又族弟惠連東
海何長瑜潁川荀雍泰山羊璿之共為山澤之徒此
其賞心之不可忘者歟

酬從弟惠連

本五章今
取一章

分離別西川迴景

影同

歸東山

叶報
梅反

別時悲已甚別後情

更延傾想遲

去聲

嘉音果枉濟江篇辛勤風波事款曲洲

渚言

賦也西川指浦陽江惠連詩云昨發浦陽汭延者思

而不絕之意枉謂見寄也按宋史惠連父方明為

會稽太守靈運造馬惠連幼有奇才不為父所知靈

運一見嘉賞遂與為別頸交其後惠連赴京師至西

陵遇風有獻康樂一篇故有是答此章既叙初別悲

戀及別後傾想之懷及述來詩所言辛勤風波之事
而其情思優游詠歎無窮焉

石壁精舍還湖中作

按孫枝東山考石壁精舍即所謂讀書齋蓋
太傅之故宅今為國慶院湖謂太湖也

昏旦變氣候山水含清暉清暉能娛人遊子淡忘歸出
谷日尚早入舟陽已微林壑歛暝色雲霞收夕霏芰荷
迭映蔚蒲稗

旁卦反

相因依披拂趨南徑愉悅偃東扉慮

淡物自輕意愜理無違寄言攝生客試用此道推

賦也谷遊名山志所謂第一谷也陽夕陽也歛聚也
霏即雲霞之餘氣芟淩也迭遞也蔚葉光鮮貌稗草
之似穀者偃息愜適也攝生猶言養生推尋究也

靈運既卜居田南時復泛舟湖上往遊舊居此詩因
暮還而作首言石壁山水之勝能使我澹然而忘歸
次叙舟中所歷景物之佳以至趨還田南偃息東扉
之樂此皆胸中自得真趣有非他人所能與者故又

明言慮淡則外物自輕意愜則物理亦順凡養生之人能以此道推之則所樂亦不假外求而自得矣

南樓中望所遲客

東山考云江曲有樓在院山下太康湖濱按遊名山志即所居園南門樓也

杳杳日西頽漫漫長路迫登樓為誰思臨江遲去來聲客與我別所期期在三五夕圓景早已滿佳人猶未適即事怨睽攜感物方悽蹙孟夏非長夜晦明如歲隔瑤華

音花

未堪折蘭苔已屢摘路阻莫贈問云何慰離析搔首

訪行人引領冀良覲

陌麥昔錫四韻古並通用

賦也杳杳遠而將暗之貌迫者路暗則行步窘迫也

適至睽乖攜離也晦明言自昏至旦孟夏晦明及篇

首日頽路迫等語並本楚詞瑤華李周翰曰麻花也

色白而香服食可致長壽楚詞云折疏麻兮瑤華將

以遺兮離居麻即今胡麻也秋始花問遺也良覲猶

言嘉會靈運既閒居無所與適惟冀親好往來相

為娛賞今所期未至登樓思望感物悽戚以至搔首
而訪問行人則其懷念之情切矣然未知其所遲為
何人也

石門新營所住四面高山迴溪石瀨脩竹茂林
石門在今嵯縣界嵯山之陽嵯山亦曰南山

嵯俗呼
音慄

躋險築幽居披雲卧石門苔滑誰能步葛弱豈可捫
嫋嫋秋風過萋萋春草繁美人遊不還佳期何由敦芳塵

凝瑤席清醕滿金樽洞庭空波瀾桂枝徒攀翻結念屬
霄漢孤景莫與援俯濯石下潭仰看條上猿早聞夕飈
急晚見朝日暎崖傾光難留林深響易奔感往慮有復
理來情無存庶持乘日車一作用非得以慰營魂匪為去聲衆
人說冀與智者論

賦也捫攀持也嫋嫋長弱之貌美人疑指惠連而言
是時遊京都過期不還故思念之醕酒之已盡者洞
庭湖名攀翻屈其枝也楚詞招隱云攀援桂枝聊淹

留晚遲也。暇日始出貌，傾歌寫也。乘日車語出莊子。書郭象註謂日出而遊，日入而息也。慰安也。人之陽靈為魂，楚詞云魂營營而至曙，蓋亦不安之意。按山居賦有南北兩居，自註云南山是開創卜居之處，蓋靈運幽隱之志，猶以田南石壁為未深，故又卜此新營也。其言石門躋扳險阻，人迹已不至，此況見時物屢變而所親之人遠遊不歸，使我徒深懷念，誰與忘憂也。且又巖林深峭，景候淒然，誠若不堪處者，感

此則不免思慮徃復于懷然達生之理一至則情慮已釋然矣今我庶幾常持此道如乘日之車任其自然得以安吾心魂之勞而遂其生也然非明識之士殆不足與論此也

登石門最高頂

晨策尋絕壁夕息在山棲
疏峯抗高館對嶺臨迴溪
長林羅戶穴積石擁基階

叶堅夷反

連巖覺路塞密竹使徑迷

來人忘新術去子惑故蹊
活活

古活反

夕流駛

疏吏反

噉噉

夜猿啼沉冥豈別理守道自不攜心契九秋幹目玩三
春萸居常以待終處順故安排

叶步
奚反

惜無同懷客共登

青雲梯

賦也疏開鑿也抗高舉之貌西京賦云疏龍頭以抗
殿止宿之舍曰館街路也活活流水聲駛疾也沉冥
潛隱而不顯也九秋謂秋之九旬三春謂春之三月
也居常待終劉向新序榮啓期曰貧者士之常死者
人之終居常待終何憂哉處順亦同此意莊子曰安

時而處順憂樂不能入也雲梯劉良曰仙者因雲而
升故曰雲梯蓋亦借用墨子稱公輸般為雲梯之語
靈運於南北兩居往來栖息此詩因還北居既久
復尋石門而作大意與前篇略同其所叙景物亦不
過幽深險阻悲響悽愴之意且謂人生各遂所趨而
我獨沉冥若此者是豈別有一理哉但當守道不變
則窮達顯晦渾然一致自無離間夫卉木秋落而春
榮亦皆順時變化莫非一氣之流行故常目玩而心

契焉今我亦惟居常待終處順安排如斯而已耳惜
無同懷之人共此登陟之樂也

於南山往北山經湖中瞻眺

南山嶠山也北山石壁精舍所在亦曰院山
即今人所稱東山者是也湖巫湖也在南山
之北山居賦云近北則二巫結湖自註云大
小巫湖中隔一山

朝旦發陽崖景落憇陰峯舍舟眺迴

一作迴誤

渚停策倚茂

松側逕既窈窕環洲亦玲瓏俛視喬木杪仰聆大壑淙

祖宗反李
善作叢

石橫水分流林密蹊絕蹤解

音蟹

作竟何感升

長

上聲

皆丰容初篁苞綠籜新蒲含紫茸海鷗戲春岸天

雞弄和風撫化心無厭覽物眷彌重不惜去人遠但恨
莫與同孤遊非情歎賞廢理誰通

賦也景日也窈窕曲折通幽之貌玲瓏謂盤屈之中

一一可見也杪末也壑坑谷也淙奔流之聲解升皆

卦名解上震下坎為雷雨解散之象易云天地解而

雷雨作百果草木皆甲拆升上坤下巽為地中生木之象丰容悅茂也篁竹名籜竹皮茸蒲華也天鷄鳥名羽有五色撫者靜察之意化謂造化乃天地所以生物者彌益也去人李善以為古人是也此篇特寫其遊玩山水自得之趣謂終日之間涉歷瞻眺景各不同且因春陽感發萬物生育動植各得其宜而我靜觀天地造化之妙中心已無厭斁况乃歷覽生物如此又知一物之中各具造化之理則眷賞之情自

不一而足也然能深知此中之樂者其惟古人乎今
我不惜其逝去已遠但恨今人莫可與同是以獨遊
興嘆非私情也正恐玩賞之事若廢則此理寢微誰
復能達其妙者是其可惜也矣

從斤竹澗越嶺溪行

斤竹澗見遊名山志今會稽縣東南有斤竹
嶺去浦陽江十里許即其地也

猿鳴誠知曙谷幽光未顯巖下雲方合花上露猶泣

犬聞

反 逶迤傍隈隩迢遞陟陁

胡庭反

峴

刑典反

過澗既厲急登

棧亦陵緬川渚屢徑復乘流玩迴轉蘋苹泛沉深菰蒲

冒清淺企石挹飛泉攀林摘葉卷想見山阿人薜蘿若

在眼

叶五遣反

握蘭勤徒結折麻心莫展情用賞為美事昧

竟誰辨觀此遺物慮一悟得所遣

賦也泣露垂貌隈隩崖曲也連山中絕為陁嶺小高

為峴閣木為路曰棧徑通作經過也乘赴也菰蔣也

俗謂之茭冒覆也葉卷謂初生未舒者山阿人楚詞

云若有人兮山之阿被薜荔兮帶女蘿本指山鬼是
時廬陵王已死故託言之握蘭棗道彥賦云握春蘭
兮遺芳折麻已見前瑶華註內事昧蓋謂廬陵王為
徐羨之等譖廢尋復見殺及已亦因此而出也得所
遣郭象莊子註云既遣是非又遣其所遣然後無所
不遣而是非去也蓋用此意此篇因登覽山水有
懷而作其言山谷幽深曉景清麗於是乘此出遊延
歷漸遠不憚陵涉迴復之勞而玩物適情悠然自得

然而所思永隔神期若存偶因瞻眺山阿而其人髣髴在目雖欲折芳贈遺以通慇懃而此心莫展徒成鬱結耳夫情以賞適為美況往事暗昧竟無為之辨明者何乃自貽憂念而不為樂哉且當觀此佳勝遺去物慮釋然一悟斯得排遣之道矣

廬陵王墓下作

廬陵王宋武帝第二子也素與司空徐羨之有隙景平二年羨之等謀廢立以次應在廬

陵因其與少帝不協先奏廢為庶人徙新安
郡尋遣吏殺之時年十八墓在鎮江府丹徒

縣

曉月發雲陽落日次朱方含悽泛廣川灑淚眺連岡眷
言懷君子沉痛切中腸道消結憤懣

悶蒲
二音

運開申悲涼

神期恒若存德音初不忘徂謝易永久松栢森已行

戶郎

反延州協心許楚老惜蘭芳解劍竟何及撫墳徒自傷

平生疑若人通蔽互相妨理感深情慟定非識所將脫

促良可哀天柱特兼常一隨往化滅安用空名揚舉聲
泣已瀝長歎不成章

賦也雲陽古縣名秦改為曲阿今鎮江府丹陽縣也
朱方即丹徒也連岡指廬陵墓所切割也道消謂少
帝失德執政擅權之時易云小人道長君子道消慙
煩冤也運開謂文帝踐阼誅徐羨之等追崇義真為
侍中復其王爵也悲涼春秋說題辭云天子崩海內
悲涼宋均曰涼愁也神期謂契好深者心神常交通

也延州吳季札也本封延陵後復封州來故左氏傳
稱延州來季子楚老彭城之父老漢書龔勝居彭城
王莽遣使徵之不食而死有父老來弔哭曰薰以香
自燒膏以明自銷龔生竟天天年也蘭芳即薰香之
謂解劍已見曹子建詩若人指廬陵也通謂明於好
賢蔽謂昧於待小人慟哀過也定非識所將呂延濟
曰定其是非識其所以將亡之端也兼倍也空名謂
所追崇之爵位泣淚也 靈運自永初三年以廬陵

之故被出至元嘉三年始徵為秘書監此詩因赴召
舟次廬陵墓下痛悼而作其言道有屈伸而人情易
感念神期之若存悲冢木之已拱雖如延陵解劍以
酬心許楚老撫墳以惜蘭芳竟何及焉且吾素疑斯
人於處衆之道或未盡善以今情理所感自可深慟
若定其是非則已識其所以將亡之端矣夫以命之
脆促事之天枉若此其甚則形既隨化而滅其於追
崇虛名亦何用哉是以舉聲垂泣而言之不能成文

也靈運既至闕因上問自南行來何所制作特舉此篇為對則其情之不能已者又可見矣

登臨海嶠初發疆中作與從弟惠連可見羊何

共和之

四章

臨海晉宋時郡名即今台州也山銳而高曰嶠疆中地名見遊名山志今嶧山下有曰疆口者疑即此所也羊何見前田南篇註

杪秋尋遠山山遠行不近與子別山阿含酸赴脩畛中

流袂就判欲去情不忍顧望脰音豆未悵烏玄反汀曲舟已隱

賦也下三章同判分也脰頸也悵通作痛骨酸也李善引陸彥聲詩云相思心既勞相望脰亦痛史言靈運由侍中自解東歸嘗著木屐登山陟嶺自始寧南山伐木開徑直至臨海此詩蓋初發南山時作以寄惠連而於首章追述其將有遠行臨別顧戀之情也

隱汀絕望舟驚棹逾

一作逐

驚流欲抑一生歡并奔千里

遊日落當棲薄繫纜臨江樓豈惟夕情歛憶爾共淹留

驚馳抑遏并兼也

承上章言欲抑平生相與之歡

而獨為遠遊然於將夕棲薄之處不惟情慮復聚且以向嘗共爾淹留於此而今不能不思念之也

淹留昔時歡復增今日歎茲情已分慮況乃協悲端秋
泉鳴北澗哀猿響南巒戚戚新別心悽悽久念攢

山小而銳曰巒久猶舊也攢聚也言因思昔時淹

留之歡而復增今日離別之歎則此情已分慮矣況
值杪秋泉鳴猿響而又協其悲端是則新別舊念一
時悽戚攢聚於心而不已也

攢念攻別心旦發清谿陰暝投剡中宿明登天姥

莫補反

岑高高入雲霓還期那可尋儻遇浮丘公長絕子徽音

剡古縣名屬會稽郡即今嵊縣也天姥剡中山名在

今新昌縣尋復踐也微音猶德音也此言將由剡

中以至臨海而諸山高絕還期莫尋儻遇神仙接引

而去則將永絕子之徽音矣夫靈運抱山水之癖肆
意遊遨無它係吝然於別從弟則含悽顧望綢繆懷
戀如此亦可見其友愛之篤也

初發石首城

石首城即石頭城為金陵之形勝者也

白珪尚可磨斯言易為縑雖抱中孚又猶勞貝錦詩寸
心若不亮微命察如絲日月垂光景成貸遂兼茲出宿
薄京畿晨裝搏曾颺重去聲經平生別再與朋知辭故山

日已遠風波豈還時
蒼蒼萬里帆茫茫終何之
遊當羅浮行息必廬霍
期越海陵三山浮舊作游誤
湘歷九疑欽聖
若旦暮懷賢亦悽其皎皎明發心不為歲寒欺

賦也珪詩作圭斯言指譖者之言中孚卦名爻指九五有孚攣如无咎之詞貝錦小雅巷伯云萋兮斐兮成是貝錦貝乃水中介蟲有文彩似錦以比譖言之文飾也察亦微細之意日月喻文帝之明茲指內史之職而言搏如搏扶搖之搏飄舉貌曾颺高風也劉

良曰張帆搏風而行羅浮廬霍皆山名羅浮在廣州南海縣廬山在南康江州之間霍山非一處此指廣東循州之龍川縣者三山按祝穆方輿勝覽即羅浮也羅浮本有三山其一在海中名浮山而羅浮乃其總名也九疑亦山名在湘水之南今道州寧遠縣界史記云舜葬於湘南之九疑聖謂舜也賢謂屈原以其沉於湘水也明發心蓋用詩明發不寐有懷二人之意歲寒喻因厄之時 宋書謂靈運因孟顓表其

有異志遂馳往京都上表自陳文帝乃不之罪而以
為臨川內史此詩蓋將赴臨川初發石頭而作言玉
之有玷尚可磨去而譖言之污人不可遽釋故我雖
抱誠信自謂无咎猶且勞此讒人飾成罪害然寸心
若不明白可信則微命易絕所幸天子明照遂成貸
宥而又兼此職命也於是出宿近地懷舊叙別且知
遠離故山渺無還期則其情念為何如耶惟當從此
遊覽山川名勝尋訪聖賢遺跡以自適耳所謂欽聖

旦暮者以見敬慕之切而期見之速也懷賢悽其者
以傷遭讒遠放而與之近似也是則此心皎皎不忘
豈以困厄自欺而變之哉

道路憶山中

采菱調易急江南歌不緩楚人心昔絕越客腸今斷斷
絕雖殊念俱為歸慮歟存鄉爾思積憶山我憤懣追尋
栖息時偃卧任縱誕

音但

得性非外求自己

李善作已非是

為誰

纂不怨秋夕長常苦夏日短濯流激浮湍息陰倚密竿

叶古反懷故叵新歡含愁忘春暖悽悽明月吹去聲惻惻廣

陵散蘇早反殷勤訴危柱慷慨命促管

賦也采菱楚歌名見楚詞註江南歌古樂府有江南可采蓮即此曲也楚人謂屈宋之流越客靈運自謂也欸扣也謂扣擊其心也存存念也爾指楚人誕放也後漢書云嚴光偃卧縱恣而傲誕纂通作纘繼也竿竹挺也叵不可也吹謂笛也古樂府橫吹笛有關山月故謂之明月吹廣陵散琴曲名以不平告人曰

訴危撐拄貌柱所以促絃者促急也 此亦因徃臨

川於道路憶始寧山中而作託言聞楚人歌調而起
懷鄉悲憤者蓋以今昔雖殊而情念不異也且又追
想舊日之縱誕乃得於稟性所好而非纂繼它人而
然所以於秋之夕夏之晝惟恐其不永而濯湍流息
茂陰自不一而足今乃何為舍此而係於官守徒懷
舊遊而莫為新歡含悲思而忘春陽之芳景哉所賴
明月廣陵二曲音節悽惻可以寫吾湮鬱之懷故既

託於急絃以自訴而又使人促管相間以激其哀聲也

入華子岡是麻源第三谷

華子岡在今建昌南城縣故老相傳華子期者用里先生第子居此山頂因以為名麻源在麻姑壇西北見顏真卿壇記

南州實炎德桂樹凌寒山

叶輸
旃反

銅陵映碧澗石磴寫紅

泉既枉隱淪客亦栖肥遁賢險徑無測度天路非術阡

遂登羣峰首邈若升雲烟羽人絕髣髴丹丘徒空筌圖

牒復磨滅碑版誰聞傳莫辨百代

一作世

後安知千載前

且申獨徃意乘月弄潺湲恒充俄頃用豈為去聲古今然

賦也南州據臨川而言吳置臨川郡今其地即撫州

之臨川縣也楚詞云嘉南州之炎德麗桂樹之冬榮


凌猶傲也銅陵銅山也在臨川縣磴登陟之道一云

巖也紅泉謂自丹砂中流出者山居賦云訊丹砂於

紅泉枉迂也肥遯猶言遠遯語見周易羽人飛仙也

丹丘晝夜常明之處仙靈所居楚詞云仍羽人於丹
丘空筌言遺跡也蓋取得魚忘筌之意牒版並記載
譜籍也獨往淮南子曰山谷之人輕天下細萬物而
獨往潺湲水流貌充猶備也靈運既至臨川復得
遨遊名山因入子華岡而作是詩言此南州地暖桂
樹冬榮而山水輝映尤為名勝故自昔賢者多栖隱
於此今我來遊遂得追踐靈跡然仙人羽化流久版
籍磨滅誰復傳聞以此思之不必辨論於百代之後

亦安用知千載已前之事乎且當中我獨往之意玩
景適情但自常充一時之用豈為欲圖久遠傳述而
然也斯亦可謂達者之言歟 詩稱陶謝尚矣鮑明
遠謂謝五言如初發芙蓉自然可愛此但言其詞之
鮮美不假雕績耳愚謂康樂陶寫性靈徃徃深造自
得誠有它人所不能及者然較之靖節之安於義命
而不忘憂國見於詞氣者又非康樂可得而並矣讀
者不可不知也



風雅翼卷六